



Fasnacht 2009

Alti Bebbi

## BOTOX-BINGGIS

S git als wie meeh Lüt, wo's grausam ins Hirni rägnet  
Die Gstörte sinn au unheilbar mit Gfallsucht gsägnert  
Nit numme Fraue sinn's, wo nit wänn elter wärde  
Au Männer - immer meeh - vergrössere die Härde  
Bängger, wo sich nümme zeige könne und halt denne  
Botox sprütze, dass me si nümme kaa erkenne  
Fraue, wo sich Küsseli löhn unter d'Bagge leege  
Gsehn uus, s'isch s'Trudi Gärschter glatt - e Miss dergeege  
In Dütschland hänn sich letscht Joor und das isch nit glooge  
Fuffzähdausig Männer so "Jungschnitt" underzooge  
Si löhn sich schnyyde, schnätzle, sprütze, lifte, glette  
Dass das nüt nutze wird, doo druff hätt'sch könne wette  
Vergäbe dien die jetzt mit Sammelklage toobe  
Denn Schwoobe kaasch zwor lifte - aber s'blyybe Schwoobe  
Und kunnt e Gruppe uff Di zue mit botoxte Gesicht  
No froggsch' Di ärschthaft, isch hüt scho dr Daag vom jüngschte Gricht?!

Mer hänn is gfroggd, wo wird is das no aanefiehere  
Wenn Glattbügler Bruschtwarze neu löhn implantiere  
Und d Hoor verlengere löhn, vorne und au hinde  
Muesch aifach zwei ha, wo me se ka aane binde  
Si löhn sich d'Büüch abbsuuge, flach, bis dief in d'Hoose  
Und silikon Dante d'Lippe prall uffblose  
Bym schmutze blatze die, gseesch s'Bluet, wo uusesaftet  
Wenn'd Päch hesch wird'sch als Kannibal oder Vampir verhaftet  
Für gniegend Gäld griegsch au no neu Hinterbagge  
Die hänn e riesegroossi Wand duss und e Zagge!

Es heisst doch immer d'Schönheit kunnt vo inne uuse  
No gseht's by dääne inne aber uus - zem gruuse  
Die gsprützte Müüler glyyche alli neumedeure  
E ganz glai bitz im Christoph Blocher syner Schnure  
Nur dr Ueli Muurer, s'neue Gesicht im Bundeshuus  
Dää het kai Botox in de Lippe - däa gseht so uus...

Im Grund gnooh isch's doch ganz normal, dass Du im Alter  
Nümme ummestäube kaasch, so wien e junge Falter  
Charaktergsichter hänn halt Furche, Falte, Grääbe  
Wo zeichnet sinn vom Liebe, Lyde und vom Lääbe  
Und füüdleblutte gseesch uus, me sait däm Neudütsch "nackig"  
Vo Kopf bis Zeche alles andere als "knackig":

Was uff dr Biere spriesst isch durchsichtig und bider  
De gseesch kuum uuse zwüsche Träanesegg und Lider  
Dört wo de s'ässe yneschopp'sch' und sottsch' verstegge  
Lauf - wenn de alt bisch - d'Helfti uuse an de Egge  
Am Bummel vo de Alte Bebbi kaasch's erlääbe  
Vyyl ziddere und dräffe statt ins Muul dernääbe  
In Ohr und Nase waggst e Hoorpelz grad wie by Hase  
Und knollig, schrumpflig, diefroot lüüchtet au Dy Nase  
Und über däm, wo friehner d'Luscht hangt, hangt Dy Ranze  
Und öbbe drunder nüt, wo uusegseht wien e Lanze  
Denn dört wo'd friehner Fүүr spүүrsch - Molto Fulminata  
Spүүrsch' meeh, als määgg em lieb isch, nur no Dy Proschтата  
Und uff de Zeche, wo sich ringle dien und biege  
Het's Auge, wo nüt gsehn und au dr Star nie griegge  
Mir hänn Arthrose, Gürtelrose, mer hänn Gicht  
Dr Faltejura gseesch bi uns im ganze Gesicht!

Me gseht's, mir Alte Bebbi, hänn is au verjünger loo  
Und nit, will mir by junge Müüsli grooss wänn uusekoo  
Denn wär syt Buebezyt zue de Basler Bebbi stoht  
Kaa's nit egal sy, wie's mit em Noowuggs wytergooht  
Denn immer weniger Buebe leehre drummle, pfyffe  
Drum hänn mer is under d'Mässer gleggt, kaasch's jetzt begryffe  
Denn wenn'd kai Jungi Garde hesch, gseesch's by dr BMG  
No wird's Dy Clique aines schönen Tages nümme geeh  
Mer wänn doch d Basler Bebbi blyybe, wie syt eh' und jeh'  
Und nit e Clique wärde, wie zem Byschpil d'VKB

Mer hänn is nit uus Eitelkeit lo d'Jooring glette  
S'Gesicht polschtere, abbsuugge loo und loo entfette  
Statt numme ummestooht, d'Händ in de Segg und warte  
Hänn mir Botox gsprützt für d'Binggis und die Jung Garde  
Suuber glettet, dien mir die Junge Bebbi stergge  
Vom Comité wird's kain und kaini mergge  
Mer rätze mit de Junge, dass die Stadt duet beebe  
Au wenn mer s'Glas und s'Wasser kuum no könne heebe

Dr Noowuggs kunnt bi uns jetzt uus dr Alte Garde  
Uns gseesch als Globi, Schlümpf und Indianer starte  
Mer dien is zoobe numme no um d'Saffre dummler  
Und dört, zue jeder voller Stund ändloos e Dagwach drummle  
Vom Stamm het Jeede an dämm Oobe au e Götti  
Wo unser Suffe bschtellt und hoolt und zaahle sötti  
Mir hänn is lifte loo, Regglaame wäär vyyl dyer  
Und wärde so für d Basler Bebbi zu Märtyrer

Mer gniess d'Fasnacht jung und botox-gspützt am Rhy  
Heerlig noo Mool Bueb und imme Buebezügli z'sy  
Mir pfläge d'Tradition, wo's by uns Alte Bebbi halt no gitt  
Bi uns kaasch wirgglig sage: „GÄLL DU KENNSCH MI NIT“!

---

D'Latärne-Uusstellig kasch gseh ab em Määntig Oobe uff em Minschterplatz.

Druck: Thoma AG, Basel